


**Los ntawm Thawj Tswj
Hwm Henry B. Eyring**

Tus Pab Cuam thib Ib hauv
Thawj Pawg Thawj Tswj Hwm



Ntuas Kom Lawv Thov Vajtsww

Thaum kuv tseem yog ib tug me nyuam me, kuv niam thiab kuv txiv nkawd qhia kuv thov Vajtsww los ntawm nkawd tus yam ntxwv. Kuv pib xav hauv kuv lub siab ces pom Leej Txiv Saum Ntuj Ceeb Tsheej nyob deb heev li. Thaum kuv loj hlob tuaj, kuv txoj kev thov Vajtsww hloov lawm. Qhov uas nyob hauv kuv lub siab rais los pom tau tias Leej Txiv Saum Ntuj Ceeb Tsheej nyob ze heev, uas yog ib tug nyob ntawm qhov kaj nrig, thiab nws paub kuv zoo heev li.

Txoj kev hloov no muaj thaum kuv muaj lus tim khawv tias Yauxej Xamiv zaj lus qhia txog tej yam uas nws pom muaj thaum 1820 hauv lub zos Manchester, New York, muaj tseeb tiag:

“Kuv txawm pom ib qho kaj nyob kiag saum kuv taub hau, ci ntsa iab tshaj lub hnuv, qhov kaj nqis zuj zus txog thaum nws nyob ntawm kuv.

“Thaum pom qhov kaj tawm los kuv tau dim tus yeeb ncuab uas tau muab kuv khi lawm. Thaum qhov kaj txog ntawm kuv, kuv tau pom ob Tug Neeg, uas ci ntsa iab thiab muaj yeeb koob uas kuv tsis paub piav txog, nkawd nyob saum ib nta ntuj. Ib tug hais lus rau kuv, tuav kuv lub npe thiab taw tes rau tus ntawd—*Nov*

yog Kuv tus Tub uas Kuv Hlub. Cia Li Mloog Nws Lus!” (Joseph Smith—History 1:16–17).

Leej Txiv Saum Ntuj Ceeb Tsheej yeej nyob hauv koog ntoo ntawd rau hnuv zoo heev ntawd. Nws hu Yauxej tuav nws lub npe. Thiab Nws tau qhia tias lub ntiaj teb tus Cawm Seej uas tau sawv rov los lawm yog Nws tib “Leeg Tub uas Nws Hlub.” Txawm yog thaum twg thiab nyob qhov twg los thaum koj thov Vajtsww, koj zaj lus tim khawv txog tej yam tseeb uas tau muaj no yeej yuav foom tau koob hmoov rau koj.

Leej Txiv uas peb thov txog twb yog Vajtsww tus uas zoo uas tau tsim lub ntiaj teb los ntawm Nws Leej Tub uas Nws Hlub. Nws yeej hnov peb tej lus thov Vajtsww yam li Nws tau hnov Yauxej cov lus thov Vajtsww—zoo npaum nkaus li peb thov kiag ntawm Nws xub ntiag ntag. Nws hlub peb heev ces Nws thiaj li tau muab Nws Leej Tub los ua peb tus Cawm Seej. Los ntawm qhov khoom plig no Nws ua kom peb thiaj li tau txoj kev tsis txawj tuag thiab muaj txoj sia nyob mus ib txhis. Thiab Nws muab txoj kev thov Vajtsww los ntawm Nws Leej Tub lub npe pub rau peb kom peb thiaj li nrog Nws sib tham tau thaum twg peb xav tham los tau.

Cov uas tuav lub Pov Thawj Hwj hauv Yexus Khetos

lub Koom Txoos ntawm Tsoom Haiv Neeg Ntseeg hauv Hnub Nyoog Kawg muaj txoj hauj lwm dawb ceev mus “xyuas txhua tus neeg hauv tsev, thiab *ntuas kom lawv thov Vajtswv rau sawv daws hnov thiab thov Vajtswv yus tus kheej*” (D&C 20:47; ntxiv cov tsiaj ntawv uas qajj lawm).

Muaj ntau yam kev ntuas kom ib tug neeg twg kom thov Vajtswv. Piv xam hais tias, peb ua tim khawv hais tias Vajtswv tau txib kom peb thov Vajtswv txhua lub sij hawm, los sis peb qhia txog tej yam uas tau muaj los hauv vaj lug kub los sis ntawm peb lub neej uas qhia txog tej koob hmoov uas tau thaum thov Vajtswv nrog kev ris txiaj, thov kom tau kev pab, thiab teb cov lus nug. Xws li, kuv ua tim khawv hais tias kuv paub tias Leej Txiv Saum Ntuj Ceeb Tsheej yeej teb peb tej lub thov. Kuv yeej tau txais kev coj qhia thiab kev nplij siab uas los rau hauv kuv lub siab, thiab kuv paub los ntawm tus Ntsuj Plig hais tias cov lus no yog los ntawm Vajtswv los.

Twb tau muaj li no rau tus Yaj Saub Yauxej Xamiv, ces nej los yeej muaj tau thiab. Nws tau cov lus teb rau nws txoj kev ua tib zoo thov Vajtswv:

“Kuv tus tub, cia koj sab ntsuj plig nyob kaj siab lug; koj tej kev txom nyem thiab koj tej kev cov nyom yuav yog ib nyuag pliag nkaus xwb;

“Thiab thaum ntawd, yog koj ua ib siab ntev nyiaj, Vajtswv mam li tsa koj nto” (D&C 121:7–8).

Qhov no yog ib txoj kev tshwm sim los ntawm Leej Txiv rau ib tug tub uas muaj siab ntseeg uas muaj kev ntxhov siab heev. Vajtswv cov me nyuam txhua tus yeej nrog Nws sib tham tau los ntawm kev thov Vajtswv. Yeej tsis tau muaj dua ib co lus ntuas uas zoo tshaj rau kuv npaum li thaum uas muaj kev hlub thiab pom qhov kaj lug uas yog lus teb rau tej kev ua zoo txo hwj chim thov Vajtswv li.

Peb yuav tau lus tim khawv txog Vajtswv ib zaj lus txib twg thaum peb ua raws li zaj lus txib ntawd (saib Yauhas 7:17). Qhov no muaj tseeb tiag hais txog zaj lus txib kom peb thov Vajtswv txhua lub sij hawm txawm yog rau sawv daws hnov los sis rau peb tus kheej. Ua nej ib tug xib hwb thiab ib tug phooj ywg, kuv cog lus hais tias Vajtswv yeej yuav teb nej tej lus thov thiab los ntawm lub hwj chim ntawm tus Vaj Ntsuj Plig Dawb Huv, nej yuav paub tau rau nej tus kheej hais tias tej lus teb yeej los ntawm Nws los tiag tiag.

QHIA LOS NTAWM TSAB XOY NO

- “Cov duab yog tej yam zoo heev los pab qhia tau lub ntsiab ntawm ib zaj lus qhia” (*Teaching, No Greater Call* [1999], 176). Muab ib daim duab txog Yauxej Xamiv los sis txog Thawj Zaj Ua Yoog Toog Pom rau lawv saib. Sib tham txog tej yam uas Yauxej Xamiv tau muaj txog kev thov Vajtswv. Nej tej kev thov Vajtswv puas yuav muaj nqis me ntsis yog nej pom tau hauv nej lub siab tias, “Leej Txiv Saum Ntuj Ceeb Tsheej . . . nyob ze ze,” li Thawj Tswj Hwm Eyring pom?
- Ua li Thawj Tswj Hwm Eyring tau hais lawm, ntshe yuav tau hais nej tej lus tim khawv txog kev thov Vajtswv, piav txog tej koob hmoov uas nej tau txais vim yog kev thov Vajtswv, los sis qhia txog tej vaj lug kub uas hais txog kev thov Vajtswv.

COV HLUAS

Kuv Zaj Lus Thov Vajtswv los ntawm Kev Ntseeg

Los ntawm Priscilla Farias de Lima

Thaum kuv muaj 18 xyoo, kuv ua hauj lwm hauv ib lub khw muag rooj tog ua ib tug neeg muag khoom. Kuv cov sij hawm ua hauj lwm nyuaj kawg li. Kuv ua hauj lwm thaum 8:00 teev sawv ntxov mus txog thaum 10:00 teev tsaus ntuj, hnub Monday txog Saturday. Kuv tu siab vim kuv mus koom tsis tau kev kawm vaj lug kub thiab tej kev ua si ntawm lub Koom Txoos li.

Kuv pib thov Leej Txiv Saum Ntuj Ceeb Tsheej nrog kev ntseeg loj heev kom Nws pab kuv nrhiav ib txoj hauj lwm uas kuv tsis tas ua rau hnub Saturday kom kuv thiaj li mus koom tau kev kawm vaj lug kub thiab lwm yam kev ua si.

Muaj ib hnub tom hauj lwm kuv tab tom pab ib tug txiv neej. Wb sib tham me ntsis, thiab nws hais rau kuv tias nws ua hauj lwm rau ib lub tsev ceev nyiaj loj heev. Kuv nug nws hais tias kuv yuav ua li cas thiaj li nrhiav tau ib txoj hauj lwm hauv lub lag luam no. Nws tau muab nws lub npe thiab tus naj npawb xov tooj rau kuv thiab nws hais kom kuv hu rau tus neeg ntiav neeg ua hauj lwm thiab hais rau tus neeg ntawd hais tias kuv paub tus txiv neej no. Kuv thiaj li mus rau hauv lub tsev

ceev nyiaj thiaj mus xeeb raws li txoj kev xeeb. Kuv xeeb tau thiab pib ua hauj lwm rau xuab moo tauj ib hnuv Monday txog Friday, lawv them kuv nyiaj ntau tshaj txoj hauj lwm qub peb npaug.

Kuv paub hais tias tus Tswv yuav coj peb kev thaum peb tso Nws ua ntej tshaj txhua yam tsav. Niaj hnuv no Nws tseem coj kuv kev. Kuv paub hais tias txoj ntsiab cai ntawm kev thov Vajtsww yeej muaj tseeb tiag.



Kev Ntseeg, Tsev Neeg, Kev Pab

Cov Neeg Zov lub Tsev

Cia li kawm tej yam no thiab, thaum tsim nyog ua, sib tham txog tej no nrog cov viv ncaus uas koj mus xyuas. Siv tej lus nug no pab koj txhawb koj cov viv ncaus lub zog thiab ua kom lub Koom Haum Niam Tsev muaj feem hauw koj lub neej.

“**N**ej yog cov zov lub tsev,” Thawj Tswj Hwj Gordon B. Hinckley tau hais (1910–2008) thaum nws qhia txog “Tsev Neeg: Ib txoj Kev Tshaj Tawm rau lub Ntiaj Teb” hauv lub tuam rooj sab laj rau lub Koom Haum Niam Tsev thaum xyoo 1995. “Nej yog cov uas muaj tau cov me nyuam. Nej yog cov uas yuav tu lawv thiab qhia lawv kom lawv txawj ua tej yam uas lawv yuav tsum ua hauv lawv lub neej. Tsis muaj dua lwm txoj hauj lwm uas nyob ze dua ntuj ceeb tsheej tshaj txoj uas tu Vajtswv tej tub thiab tej ntxhais.”¹

Twb tau yuav luag 17 xyoo lawm es zaj lus tshaj tawm no tau qhia tias peb tej hauj lwm uas tseem ceeb tshaj plaws yog los ntxiv dag zog rau tsev neeg thiab hauv tej tsev—txawm hais tias peb ua neej nyob zoo li cas los xij. Barbara Thompson, uas tam sim no yog tus pab cuam thib ob hauv lub Koom Haum Niam Tsev pawg thawj tswj hwj, tau nyob hauv Salt Lake lub Tsev Kheej thaum Thawj Tswj Hwm Hinckley nyeem zaj lus tshaj tawm no thawj zaug. Nws nco tau hais tias “lub sij hawm ntawd yog ib lub sij hawm zoo kawg li.” “Kuv pom tau qhov tseem ceeb ntawm zaj lus ntawd. Kuv kuj tau xav hais tias, ‘Nov yog ib txoj kev qhia uas zoo kawg rau cov niam txiv. Kuj yog ib lub luag hauj lwm loj heev

rau cov niam txiv thiab.’ Kuv muab xav ib pliag ces kuv txawm xav tias qhov no tsis yog hais txog kuv vim kuv twb tsis tau muaj txiv thiab tsis muaj me nyuam. Tab sim ua rau kuv xav kiag tias, “Tab sis yeej hais rau kuv. Kuv yog ib tug neeg ntawm ib tse neeg. Kuv yog ib tug ntxhais, ib tug viv ncaus, ib tug niam tais los sis phauj, ib tug viv ncaus kwv tij, thiab ib tug ntxhais xeeb ntxwv. Kuv muaj tej luag hauj lwm—thiab tej koob hmoov—vim kuv yog ib tug neeg ntawm ib tse neeg. Txawm hais tias kuv yog tib tug neeg ntawm kuv tsev neeg xwb, los kuv tseem yog ib tug neeg ntawm Vajtswv tsev neeg, thiab kuv muaj lub luag hauj lwm los pab ntxiv dag zog rau lwm tsev neeg.”

Yog ib qho zoo heev, uas peb tsis tas ua tej no peb ib leej xwb. Viv Ncaus Thompson hais tias “Txoj kev pab loj tshaj plaws uas peb yuav muaj ntawm kev ntxiv dag zog rau tsev neeg yog los paub thiab ua raws li tej lus qhuab qhia ntawm Khetos thiab cia siab kom Nws pab peb.”²

Los ntawm Peb zaj Keeb Kwm

“Thaum Viv Ncaus Bathsheba W. Smith yog tus tuam thawj tswj hwm thib plaub rau lub Koom Haum Niam Tsev [thaum 1901 mus txog 1910], nws pom tau hais tias tsev neeg xav tau kev pab ntxiv dag zog, ces nws

thiab li txhim tsa zaj lus qhia cov niam tsev rau lub Koom Haum Niam Tsev cov viv ncaus. Tej zaj lus qhia no qhia txog kev sib yuav, kev tu yus tus kheej zoo thaum xeeb tub lawm, thiab kev tu me nyuam. Tej zaj lus qhia no kuj txhawb nqa Thawj Tswj Hwm Yauxej F. Xamiv tej kev qhuab qhia txog lub Koom Haum Niam Tsev txoj kev pab cov poj niam ntawm lawv tej hauj lwm hauv tsev:

“Nyob txhua qhov txhia chaw uas tib neeg tsis paub zoo los sis tsis to taub zoo hais txog tsev neeg, uas hais txog tej hauj lwm uas yuav tsum ua ntawm tus txiv thiab tus poj niam thiab ntawm niam txiv thiab me nyuam, ces lub koom haum no nyob ntawd los yog nyob ze, thiab dhau los ntawm lawv tej txuj ci thiab tej kev tshoov siab uas lub koom haum no muaj, cov poj niam no npaj lawm kom los qhia txog tej hauj lwm tseem ceeb no.”³

LUS CIM

1. Gordon B. Hinckley, “Stand Strong against the Wiles of the World,” *Ensign*, Kaum Ib Hlis Ntuj 1995, 101.
2. Barbara Thompson, “I Will Strengthen Thee; I Will Help Thee,” *Liahona* thiab *Ensign*, Kaum Ib Hlis Ntuj 2007, 117.
3. *Daughters in My Kingdom: The History and Work of Relief Society* (2011), 153.

Los ntawm cov Vaj Lug Kub

Paj Lug 22:6; 1 Nifais 1:1; 2 Nifais 25:26; Amas 56:46–48; Doctrine and Covenants 93:40

Kuv Yuav Pab Li Cas?

1. Kuv yuav ua li cas thiaj pab tau cov viv ncaus uas kuv saib xyuas txog kev ntxiv dag zog rau tsev neeg?

2. Kuv yuav ua li cas ua ib tug yam ntxwv uas koj ncaj ncees hauv kuv tsev neeg?

Kom tau ntaub ntawv xov xwm ntxiv, cia li txuas rau reliefsociety.lds.org.